

## A Friuli Doc al rive “Frico-Man”, la version furlane di Pac-Man

E je la iniziative ludiche promovude de ARLeF pe manifestazion.  
In program ancje un spettacul teatrâl e un laboratori pai fruts

Si clame **Frico-Man** la version speciâl par furlan di Pac-Man che e sarà presentade pe prime volte in ocasion de gnove edizion di Friuli Doc, **ai 9 di Setembar aes 17.00, te Cort di Palaç Morpurgo**, dulà che e restarà a disposizion di piçui e grancj fin ae fin de manifestazion.

Insieme cul protagonist dal famôs videozûc *vintage* – che si podarà zuiâ cun chel in graciis di un cabinât originâl dai agns '80 – a saran ancje i siei nemîs mortâi: lis fantasimutis Blinky, Inky, Pinky e Clyde, che par furlan a cjaparan il non di Vigjut sedon, Bepi çondar, Catine peteç e Meni gneur. La simpatiche iniziative, promovude de ARLeF e realizade di Ensoul, e nas par promovi il sît [www.ghiti.it](http://www.ghiti.it), portâl bilengâl (furlan talian) pe infanzie, che al puarte fruts e gjenitôrs a scuvierzi la marilenghe cun zûcs, cartons animâts, videos e tancj altris contignûts divertents.

Par une dì, duncje, a Udin si podarà fâ un vêr viaç tal timp cuntun classic dai videozûcs, che al permetarà a gjenitôrs e fîs di sfidâsi a gratis. Se i prins a tornaran fruts, i plui piçui a cognossaran il “nono” dai videozûcs di vuê. «*O sperî che si divertissin une vore*», al à comentât Fulvio Romanin, titulâr di Ensoul, che pe ocasion al à tornât a meti a gnûf un Pac-Man, modificant la componentistiche e lis schedis, par che al podès “fevelâ” par furlan, fasintlu diventâ cussì Frico-Man!

Cheste no sarà la uniche iniziative de Agenzie Regjonâl pe Lenghe Furlane in ocasion di Friuli Doc. In graciis de ARLeF, ancje chest an, il furlan al sarà protagonist de manifestazion!

Si tacarà ai 8 di Setembar, aes 21, te Cort di Palaç Morpurgo, cuntune leture seniche cun musiche e dissens dal vîf sui agns furlans di Pier Paolo Pasolini: “**Di chesta tiara lontana**”.

Ai 9 di Setembar, inte stesse ambientazion, aes 16 al sarà “**Zuìn e imparìn cun Daria Miani de transmission “Maman!”**”, un laboratori pai plui piçui curât de ARLeF e presentât de condutore de transmission televisive pe infanzie in lenghe furlane, risultât di une coproduzion fra la Agenzie e Telefriuli (canâl 11 dal digjitâl terestri). Tant amade dai piçui telespetatôrs, in ogni pontade a vegnin proponudis esperiencis ludichis e educativis adatis pai fruts des scuelis maternis e primariis. Il stes *format*, fat di zûcs e didattiche, che al sarà proponût in ocasion di Friuli Doc!

Ma al fevele in marilenghe ancje il sît internet de manifestazion enogastronomiche, in graciis dai servizi di traduzion metût a disposizion dal Sportel regjonâl pe lenghe furlane de Agenzie, come ancje i menûs di “Friuli Doc in Ostarie”, iniziative promovude di

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

Confesercenti e dal Comitât di Difese des Ostariis Furlanis. «*La presince de ARLeF a Friuli Doc e je aromai consolidade – al à dit il president de Agenzie, Eros Cisilino – in graciis de sinergie stabile cun partners istituzionâi tant che PromoturismoFVG, che nus ospitarà intal bancut di Cort Morpurgo. Un an daûr di chel altri, o stin pontant simpri di plui su la culture, no limitantsi dome ae distribuzion di materiâi, ma cjapant dentri cui che al à decidût di passâ un pôc di timp in citât intai dîs de manifestazion cun diviers apontaments bogns di rivâ a bacins di utence diferents*».

Udin, 1<sup>n</sup> di Setembar dal 2022

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF CALT** relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<